

## ASISA KHA TE ADING NANGBANG SEMTHEI?

I Cor 15:29

*Tua ciangin thu khatah, a sisa mite' tangdingin tui a kiphum mite in bang a deihna uh ahi hiam? Misite ki hingkiksak hetlo ding ahih leh bang hangin a sisate' tangdingin tui kiphum ahi uh hiam?*

Christian mitampi te in asisa kha te adingin eite in bang mah i semthei nawnkei hi. Asisa kha te adingin thunget sakna, thupha bawlna akipan bangmah in amau te kha honthei nawnlo hi. Banghanghiam cih leh amaute in avawh bangun a atding ahi uhhi. Hell gamtungding te ahihle amau thalawhsa thaman sangding uha, tua mah bangin, vangam zuante zong Pasion tawh mangkhawm ding uhhi. Hih thu hangin, asisa khate adingin bangmah nasepsak thei ngeikei dinghi. Asisa kha te adingin thu ngetsakna in zong amawkna pi ahihi ci-in, amaute ngaih sut thupen thuman leh thutak sa in genbel in neithe uhhi.

Laisiangtho sungah misisa kha te adingin bang kisepsak hiam cih athei leh, atel te ading in ahih leh, misisa khate ading in i sepsak theih a omte kan in, sepsak na in, amau te tawn tung nuntakna ngahnang apai na uh lampi ah, nakpi takin huh hi cih i mu thei hi. Sawltak Paul in hici bangin hong hilh hi:

*Tua ciangin thu khatah, a sisa mite' tang ding in tui a kiphum mite in bang a deihna uh ahi hiam? Misite kihingkik sak hetlo ding ahih leh bang hangin a sisate' tangdingin tui kiphum ahi uh hiam? (1 Cor 15:29)*

*Tell me, what can be the use of being baptized for the dead, if the dead do not rise again? Why should anyone be baptized for them?(1Cor 15:29).*

Greek Lai in: Ἐπεὶ τί ποιήσουσιν οἱ βαπτιζόμενοι ὑπὲρ τῶν νεκρῶν; εἰ ὅλως νεκροὶ οὐκ ἐγείρονται, τί καὶ βαπτίζονται ὑπὲρ αὐτῶν;.. (1 Cor 15:29).

Latin lai in: *Alioquin quid facient qui baptizantur pro mortuis, si omnino mortui non resurgunt? ut quid et baptizantur pro illis?*(1Cor 15:29).

Hih Laisiangtho i etciangin, Paul hunlai pek in asisa mite adingin anungta lai mite in thungetsak bektham lo in, amaute kitui phumthei nawnlo, kituisawp thei nawnlo uh ahih manin, amau te tangin, anungta lai mite in kitui phumsak in, ki tuisawp sak ahihna thu teltak leh siangtak in kimu thei hi. Tua banga gamtatna pen Paul in taabawlo, manlo hi zong cilo in, tua bang gamtatna pen tua asisa mite in tawntung nuntakna angah nadingin thawhkikna sungah akihin sakkik nang ahihi ci-in, na gen hi.

Tua hi leh, asisa kha te adingin anungta lai eite in bang mah kisemthei nawnlo hi, thuzong kingetsak thei nawnlo a, amau te in amau te vawhbangin a atding uh ahihi cih thuhilhna leh thugen nate Laisiangtho tawh nuntakna upna i ci thei dinghiam cih thu tel huai mahmah hi. Tua bangin upna in Paul in Laisiangtho sungah honghilhna tawh kituak hi i ci theikei hi. Asisa mite adingin kitui phum in, kituisawp uh ahih leh, tua in bangkhiatna nei ahi hiam? Asisa mite ading in anungta lai eite in Pasion hehpihna ngahsak thei lai hi cihna ahihi.

**Timoti nihna 1:16-18** na ah, Paul mahmah in asisa Onesiphorus adingin athungetsak na i mu hi.

*Onesiforas in tamveipi kei hong lungnuamsak ahih manin Pasion in a innkuan bupun hehpih na thu pha pia ta hen. Topa in tua Ni ciangin ama tungah hehpihna thupha pia ta hen. Efesa khua-ah ka omlai-in nakpi takin kei a hong huhnate khempeuh na theihsa ahihi.*

Hih Laisiangtho sungah **tua Ni ciangin** acih pen thukhen nani acihna ahihi. Mikaanglai in hici bangin naki gelh hi:

*The Lord grant that he may find mercy with his Lord when that day comes; what he did for me in Ephesus I have no need to tell thee (2Tim 1:18).*

*Det illi Dominus invenire misericordiam a Domino in illa die. Et quanta Ephesi ministravit mihi, tu melius nosti (2Tim 1:18).*

Paul in hilai agelh laitak in, Onesiphoras (Onesiforas) asikhin ahihi. Tua ahihmanin, Paul in anunung thukhen na niciangin, Onesiforas in Pasian hehpihna ngahta hen, banghanghiam cih leh amah in kei tungah bangmah kaki sapna omsak hetlo in honghuh pa ahihi ci-in athungetna ahihi. Hih Laisiangtho khan sungah Paul in asisa Onesiforas ading hizongin, anungta lai a innkuanpih mimal ading ahi zongin, thu ngetsak hi. Hih thu hangin, ei Catholic Christiante in Laisiangtho sungah Sawltak te leh Topa Jesu honghilhna te tawh kituak in, anung ta lai te adingbek hilo in, asisa thu ummi te kha in vangam nuam angahna dingin, Paul mahbangin thu i ngetsak den hi.

Asisa mite adingin anungta lai mite in tuikiphumsak, tui kisawpsak ahih leh, asisa mite adingin bangmah kisem thei nawnlo hi cih theih nading Laisiangtho in hongphal lo hi.

**Theihding:** Laisiangtho khan te Tedim lai, Mikaanglai, Greek leh Latin laitawh kongat hi. Kadeihna in, ei Tedim laipen kicinglo in, kitelkhal tawntung thei ahih man in, adiakdiak in Mikaanglai thei te in, etkaak theihding kadeihna ahihi. Misisa kha te ading thungetsak na pen Maccabees Laisiangtho sungah teltak in kimu thei hi. Ahi zongin, sanggam Christian te tawh kikamkup na te ah, Maccabees pen amau te in theilo ahih manin, hih konglai gelhna sungah kong helkei phot hi.